



مناسب حيات يولداشى سئچماق، زندگانلىغى لاپ مهم انتخابيدير و بو زمينهده بالاچا اشتباه انسانى بير عمر پشيمان ائلهيه بيلر. جماعتين چوخو لاپ ياخجى تصميم توتدوقلاريني دوشوندوقلارى زمان، لاپ بؤيوك اشتباهلاريني ائلهديقلارى زمان اولور. بونا گؤره حيات يولداشى سئچماق ايسته سز بو ايشى عقل اوزو اينن گؤرون و يولوزون اوستونده دوزولموش اشتباه قويولارينا دوشماقدان چكيني.

ئولنماق نيتينده اولساز بو دوققوز مسألهده توولانماغا دقتلى اولون:

بيرينجى قويو: گؤزلىق

هاميميز گؤزلىغى سئويپ اونا جيد اولاروق. آما حيات يولداشى سئچماقدا بو مسأله نين حددن آرتيق نقشى اولسا ايشى اوتوزموشوق. ياخجى اولار ئولنماقدان اول سيزه نه لرين اولويتده اولدوغونو بللى ائله يه سيز. هرچند گؤزلىغين سيزه اهميتى وار آما نه لرى گؤزلىقدان داها آرتيق اهميتى وار؟ هانسى معيارلارى گؤزلىغا قربان وئره بيلرسيز و گؤزلىغى هانسى معيارلارا قربان وئرماغا حاضر سيز؟ بو انسان بو قدر گؤزل اولماسايدى يئنه ده اونولا ئولنماغا حاضر يديز؟

ايكينجى قويو: اجتماعى موقعيت

اجتماعى موقعيت، حيات يولداشى انتخابيندا چوخلو اشتباهلارا سبب اولان مسأله لر دندير. گؤزه گليم موقعيتلر، انسانلار ين او بيرى خصلتلرينى گيزله ده بيلر. بونا گؤره بئله انسانلارى حيات يولداشى سئچماق ايسته ينده آرتيق دقت ائله مه ليسيز. دقت اولونماسا سيز او طرفين «موقعيتى» اينن ائولنمىب آما سيزه مجهول اولان «اؤزو» اينن بير دام آلتيندا ياشيا جاقسيز.

بونا گؤره بئله آداميان ائولننده دوشونمه ليسيز كى او انسانين بو مقعيتى اولماسايدى يئنه ده اونولا ئولنماغا حاضر اولار ديز؟

اوچونجو قويو: حددن اؤتوق سئوماق

ئولنماغا لازم اولان ملزمه لر ين بيرى ده سئوماق دير، آما كفايت ائله مز. ئولنماغين انگيزه سى فقط سئوماق اولسا اونون نفرت اوزو اينن داغيلماسيني گؤزله ماق اولار.

حيات يولداشى سئچماغين لاپ قورخولو حاللار يندان بيرى سئودالى اولماق دير. بو حالدا، سيز احساسات و عشقين تاثيرى آلتيندا واقعيتلرى گورماغا گوجوز چاتماز. عاشق فقط گؤزلىقلارى گورر. عاشق انسانا دئسن بير آزدا عقل اوزو اينن باخ، اصلاً قبول ائليه بيلمز. چونكى مغز بو احساسات ايچينده طبعى ايشيني گوره بيلمز.

بئلنچى موقعيتلرده ياخجى اولار رابطه دن فاصله آچيب سئوگى تى نين آزالماسيني گؤزله يه سيز سونرا عقل اوزو اينن گله جاغيز اوچون تصميم توتاسيز.

دوردونجو قويو: تكلوق حسى

سوبالغين تكلوقى بعضاً دوزولمز اولور. ائولى يولداشلار بير يئره ييغيشاندا اولا بيلر سيز سوباي اولدوغوز اوچون اونلار ين جمعينه داخل اولا بيلمه سيز. فاميلليقچن گزماغا گئدير سيز، همى اؤز حيات يولداشى اينن بيردير آما سيز تكسيز. همكارلار يز ين هاميسى ايشدن ائوه قايداندا اونلارى اهل عيالى گؤزلور آما سيزى در-ديوار. بو آندا خطر زنگى چالاغا باشلير.

بو تكلوق حسى سيزى هر نه تئزراق ئولنماغا سوق وئره بيلر. سيز بو حس ين ايچينده اولان زمان بيرى راستيزا گلسه اونو نجات فرشته سى بيله جاقسيز و آغينا قره سينا باخمادان ئولنماق قرارى وئره جاقسيز.

بو حس چوخ راحت سيزى اشتباها سالا- بيلر. بو حس سيزده يارانميش اولسا ياخجى اولار اونو دوستلار و يا فامئل جمعينه اولماغينان آرادان آپاراسيز و سونرا ئولنماغا اقدام ائليه سيز.

بئشينجى قويو: تلسماق

سيز طايفانين سوباي قالميش تك جوانيسيز، هامى نين گؤزو سيزده دير كى هاواخت ائولنه جاقسيز. سيز ائوين بؤيوك باجيسى سيز كيچيك باجيلار ئولنماق اوچون سيزى گؤزلورلر. آخى اونلار ين دا ائلچيسى وار! و يا ائلنماغا يوانميسيز و ايندى بيردن بيره باخيب گورورسوز كى ائى واى قوجالديم فوراً ائلنمه لى يم! بو مسأله لر ين هئچ بيرى سيزى تلسديرمه مە ليدير.

تَلَسِيك زمانلاردا اولان انتخابلارين اشتباه احتمالى چوخ اولور. بونا گوره حيات يولداشى سئچماقدا اصلاً تَلَسْمه يين.

آلتينجى قوبو: ناقص تانيماق

بير انساني كامل تانيماميش اونولا. ائولنماق كاملاً اشتباه ايشدير. اونو هفته باشلاري شام يئماغينان و يا فقط تلفونلا دانيشماغينان تانيماق اولماز. 20 ايلده بير اينن بوجور رابطه اولسا اونو تانيماق اولماز. بيرى اينن ائولنماق ايسته سز اونون زندگانليغيني، خانواده سيني، كئچميشيني، اخلاقينى و دوشونجه سيني تانيماليسيز.

يئددنجى قوبو: روحى بحران

قاپاكي رابطه دن اورگيز سينيپ، هله ده اونون ياراللاري ساغالماييب و عادى زندگانليغا قايتماميسيز، ايندى اوزوره بير همدم آختاريسيز. اما بو وضعيته ائولنماغا تصميم توتماق و حيات يولداشى سئچماق اشتباه حركتدير.

روحى بحران آيرى مسأله لره گوره ده يارانا بيلر. اولا بيلر تازاليقدا ياخين آداميزى الدن وئرميش اولاسيز و يا ايشسيز قالاسيز و يا سيزى بحران سالان هر مسأله قاباغا گله بيلر. بحران شرايطينده حيات يولداشى سئچماق سيزه گله جاقدامشكله ساللا بيلر. چونكى سيز بحراندا اولاندا ياشايشا باخديغيز زاويه فرقليدير و او آندا نظريزه مناسب گلن شخص بحراندا سونرا آيرى جور گوروشه بيلر. بحراندا سونرا آيليب گوره جاقسيز كى بو آدامينان اصلاً تفاهموز يوخدور و تعجب ائليه جاقسيز كى نه جور اولوب اونولا ائولنميسيز.

سككيزنجى قوبو: سرخوشلوق و هيجان

سيز خوش گئچن بير قوناقليقدا و يا تويدا نظريزه يوخولاردا آختارديغيز و بئره سيزه راست گلن بير اينن تانيش اولموسوز. اونون باره سينده دوشوننده ايجيز سئوينچ اينن دولور و هيجانلانيرسيز. ياخجى احساسدير اما ال ساخلايين و ائولنماغا تلسمه يين كى اوچورومون قيراغيندا داينميسيز.

مثبت هيجانلار، منفى هيجانلار كيمي انساني دوز تصميم توتماقدان يانديرار. خوش لحظه لين سرخوشلوقو انسانين باخديغى زاويه نى ديبشر و انسان اوز هميشه ليق گوزو اينن باخانماز. انسان او حالدا هر شئىي گوزل گورر و هر شئيه مثبت باخار. ياخجى اولار بو حاللاردا ائولنماغا تلسميه سيز. ذهنين آراملاشماسى اوچون بير مدت دوزون.

دوقوزونجو قوبو: بسه بسليقق

بسبه بسليق انسانين گوزونو واقعيترين اوزونه باغلار. انسان بير اينن بسبه بسليق ائله ينده تصميملرين چوخو اشتباه اولار. چونكى او آندا تكجه هدفى بسبه بسليق ائله ديغى شخصدن قاباغا دوشماقدير و بو يولدا چوخ شئيلرى قربان وئره بيلر.

شايد بيرى نين گوزونده يوخارى گوروشماق اوچون خاص بير انسان اينان ائولنه سيز. و يا دوستوزون فلان طايفاداكى بير شخص اينن ائولنمه سى سيزى داها يوخارى بير طايفادان ائولنمگه هوسلنديره. اما ال ساخلايين! ياخجى اولار بسبه بسليغا آيرى يئر تاپاسيز، ائولنماق بوجور شوخولوقلار گوتورمز.